

焦氏澹園續集

焦氏澹園續集卷十七目錄

哀辭

王太史哀辭

焦氏澹園續集卷之十七

哀詞

王辰玉太史哀辭

並序

太史字辰玉吾師荆石先生冢嗣孝於親信於友  
治經術甚精而文成子秋首舉京師其制義傳播  
海內如鳳采星輝人人快覩皆曰我師之能成其  
子如此也又曰君之克肖如此也亡何言者計君  
以元老之子登上第可借以立聲名攫貴富遂出  
力攻之君置不與辯逡巡引退者數年迨師罷相

家居乃就禮部兩試皆第二人授史職遠近大悅  
服君念師老復引退久之以疾聞會 上虛首揆  
席起師於家師以君疾不能舍去君無所爲計至  
爲文禱於神繩繩千言余得而讀之知君志在天  
下真切遠大絕非僅僅自營者可及藉令行君之  
志其功業可勝道哉而卒以夭歟嗚呼悲已君文  
甚奇而不免中於讒才甚豐而不獲大其施孝甚  
篤而不能竟其養况其度淵然其貌冲然譬之萬  
斛之舟未實一二也而乃止是邪始若種學績行

慕而效之者半天下至今學士大夫蓋人知其名  
家有其書也而畸於人復畸於天余不知其解矣  
余辱師特達之知而未一接君然知家庭議論間  
意常在余也嗚呼已矣爰作哀辭以抒余悲并告  
吾師而稍解其意云

維今儒館並世英奇翹翹東箭藹藹南圭惟君韞  
秀靡施不宜羣言競出爭見其能君文獨邁炳蔚  
醇深絕去刀尺星輝日晶他人磨礪各出圭角君  
度汪然不見其樸如萬頃陂其疇能度學窮流略

行埒淵騫孤風霞舉逸翮鵬搏雲間日下誰能比  
肩雖暫卷懷國謀是負樂善下賢不啻其口如居  
朝廷而有責守以斯器業孰謂不酬羽翼王路潤  
色帝猶韋玄楊秉異代同謀道乃光華疾成沈痼  
玉毀蘭枯松摧桂蠹哀哀下泉長寐不寤嗚呼哀  
哉人忌其上入朝則排論定乃公雖仇謂材非情  
之殊勢則然哉讒鋒甫戢譽問琅琅如何夫子今  
也則亡人情不美天亦茫茫膏明乃然醴甘必竭  
數之乘除於君奚擇惟其永存德音不易嗚呼哀

哉來無所從去復何適舟行弛維月盈掩魄如旅  
得歸消搖本宅達人一盼眴之儻然况留其餘以  
待後賢無以慰君聊爲此言嗚呼哀哉

焦氏澹園續集卷十七

終

焦氏澹園續集卷十八目錄

祭文

祭少司馬耿公文

祭王倚山文

祭漆清軒文

祭程別駕文

祭余封君文

祭汪孺人文

祭陶司成文



祭王荆翁殿學文

祭高別駕文

祝文

名宦祠祝文

鄉賢祠祝文

衡府紀善周公祝文

鄭介夫先生祠祝文

黃侍中祠祝文

耿師新祠成告文

楊道南先生入祠告文二首

祭少京兆黃雲蛟文

焦氏澹園續集卷十八目錄終

焦氏澹園續集卷之十八

祭文 祝文

祭少司馬耿公文

於維我師懿德乘時學宗洙泗業擅夷夔持衡秉  
鐸蔚爲世儀公也何爲旁撽遠紹親則父兄誨則  
師保緩袂繙經其成則早軒然鳳舉作時珪璋起  
曹奮跡嘉問芬芳神無留韻器不滯方 帝閔民  
勞成都出麾奉行細劄褰去垂帷如醺江河以漑  
町畦尋以文學師表閩越一經品題精采奮發多

士顯聞於今未絕民歌豈弟士仰范型 上曰汝  
賢召侍承明容臺納言接武以升鎬京長江姦盜  
逋放他嚴見欺公愛不犯人歸其功我服其量先  
後十載盜息民寧晉少司馬乃以最行相別俛仰  
遽隔幽明嗚呼痛哉言念同門培植有年旣歷三  
紀悉爲名賢今如晨星存者幾人時英盡矣我亦  
白髮有訃自西方食哽噎聞公遺言一倍淒惻嗟  
仁有後天道之常其門日大其道益光公可無憾  
余亦胡傷遺德孔長殲良則速杳杳儀刑森森軌

躅匏葉何慙隻雞可續尚饗

祭王倚山文

嗚呼昔馬伏波之慕善人則曰鄉里而御欵段莊  
南華之言物故則曰巨室之偃歸人嘗研味其深  
旨竊有感於前文維靈賦材挺特卓茂足不踰乎  
百里之間目不挂乎羣言之囿乃能僮千人如卓  
氏金三致如岑研固已儕才諳於往古超倫類而  
獨先縱一往而奚憾如逆旅之得還矧乃令子炎  
方宦涉赤管朝操青緘夜襍贊官方而勞畫有經

守庭訓而準繩無越間關萬里凶問遙聞毀冠裂帶雪涕星奔門外之征車甫稅庭內之遺容莫覲不盡者心難言者命未謁季梁之醫已革曾參之病嗚呼痛哉壺有芳醕俎饒肥羜冀招搖而來下忽精魂其何處愧悲誠之莫寫聊片言以占叙

祭漆清軒文

業患不精公學旣成螢燈雪案歲幾周星樂而玩之孔翼文經名患不聞公早有聲經明行脩冠於月評久次而升模楷舒城秣陵之良於舒大造舒

人有言朱拊漆敎民歌且舞士則而效譽問騫騰  
超躋廣庠公意倦游懸車相羊歲月幾何遨遊道  
鄉踰七望八不爲不壽有子及孫克昌厥後乘化  
令終亦復奚咎得喪乖迕人世則然譬之寫水難  
爲方圓如公生平所得已全死生離合人情所重  
蓋棺事已寧不爲慟一觴之奠技淚以送尚饗

祭程別駕文

嗚呼維公行履敦和才猷宣朗聲動辟雍評高閭  
黨閱歷旣深見聞彌廣筮仕大官玉食是掌鵷鷺

參陪枇杷嗣響俄焉一麾半刺以往匡救闕達明  
燭抑枉織葦羅含破桺周敞於公視之齊名無兩  
倦歸白門挹茲勝覽理學名祠忠臣幽壤經之營  
之矢志弘獎晚築憩園壺觴跌宕案石獻奇籠禽  
競爽目豁耳娛從容偃仰謂可百齡安此善養不  
見幾時遽聞屬纊賓朋弔哭相視愀恍惟餘音徽  
徘徊跂想薄陳酒馥爲布疇曩公聞不聞揮淚泚  
頽嗚呼尚饗

祭余封君文



惟公跌蕩而扶義與節俠而爲疇眡親疏之急難  
常赴之以若流逮中年而自斂又折節而潛脩憶  
效陳翁之家法以馴行而貽謀迨乎公之嗣興協  
世德以作求惟土肥而不穡乃倍獲於有秋幸令  
子之鵠起錫綸綍於宸旒錯繡衣於斑斕享鼎  
食於林丘望七旬而將屆方矯健而優游何人生  
之靡常乃忽泛夫虛舟歎訕信之俄頃覩榮華之  
遽適合遠邇而咸哀倍予衷之咿嚶愧老病以因  
循欲執紼而莫由聊片詞以伸奠冀鑒格於玄幽

尚饗

祭汪孺人文

嗚呼哀哉海陽之英畢效於人惟靈伉儷孕懿含醇憶思馨翁孝友維則靈實佐之輔其遺闕翁之義方秩秩有條靈實佐之愛而能勞方其立朝以諸勝隨小星逮下無愧周詩已而居鄉逍遙林莽荷檐深藏不殊莖養靈繫靈教其儀孔多况我同里是則是模年躋八旬備膺壽祉猶希百齡以慰孫子天胡不淑菴沉婺星遠邇驚悼靡不涕零曰

仁有後其門必大存順歿寧况復無愧 綸緯之  
褒異日可待通家分誼寓情一觴南望松蘿浮雲  
無光靈其有知格之洋洋尚饗

祭陶司成文

昔始見君已丑之歲余仕方初君志亦銳讀書談  
道握手歡然抗心希古自以無前剖析疑義游心  
幾微聞者河漢君獨不疑謂相推挽可升道岸出  
其緒餘匡時拯難二十年間離合相兼余以讒擯  
君秩稍遷意終合并以旣厥緼豈期一疾遽殞其

命嗚呼痛哉君勤於道而志未了孝於親而後莫  
嗣顯其身而願未伸豐於材而用未試問譽空長  
聲容難跂獨留文章照曜天地嗚呼痛哉念世事  
之如幻同一盡於百年方峩峩而玉立忽茫茫而  
颺旋手遺扎以自疑欲相從而靡緣涕洟瀾而莫  
禁聊寓哀於片言嗚呼痛哉尚饗

祭王荊翁殿學文

嗚呼公之嚴毅相合豈偶予實後進晚而相邁心  
乎愛矣不啻其口顧予淺薄敢辱公知手握鉛刀

宰制未施儲而待匱冀以益時公俄歸田予亦遠  
蹈中心懷慙何以自效詎期一旦生死難料嗚呼  
哀哉公之材品今世所稀獨蒙主眷首贊萬機  
魚水相得心膺是依公秉清格毫髮必辨轉移墨  
風在一顧盼誰其似之古之楊綰國有大疑盡規  
獻替意篤而婉愛濟其誼誰其能然厥有陸贄片  
善盱衡一稅抵掌剪拂爲懷綢繆結想以昔揆今  
梁之任昉主器未定蚤夜懷憂功成羽翼赤松與  
遊公於是時漢之留侯衣衣東歸帝眷未已安

車蒲輪逆之田里辭避再三祇榮若緇方期弘化  
儀刑萬方俛仰之間公也則亡 皇心震悼行路  
盡傷嗚呼哀哉國步之難誰與匡之及陋有人誰  
與揚之民有凶災誰與禳之下寮有咎誰與明之  
公之存也桃李孔多迨其末路同室操戈勢則使  
然公如之何人情險巇朝暮異狀所不易者 上  
心嘉獎生被殊遇殤獲大葬予也辱公特達相成  
感恩知己兼於一身僑善孰爲牙弦絕音承凶以  
來爲位而哭竊比昔人生芻一束摘詞寫心老淚

盈掬嗚呼哀哉尚饗

祭高別駕文

嗚呼古道日微遺美在君行有不散之樸道合太和之醇行誼信於朋友孝友配乎古人筮仕龍南以古爲師不阿不競一節自持民之阿保士之表儀再蒞於婺唯下是卹靡始與終政求厥實口碑流傳遐邇如一人謂君才未罄其素如行康莊千里跬步坦中直道乃以媒妒於宦未遂其志則伸耄老歸來龍臥願神彈丸日月逆旅乾坤方期歲

時扁舟來往追良朋之笑談撫芳辰而偃仰如鴻  
飛之冥冥亦奚羨於塵網蘊真抱樸爲樂孔全惜  
也昊天遽奪其年宗姻悼切士友悲纏嗚呼傷哉  
人道靡常百齡若寄殤短彭修均一澌逝得正而  
化餘復何計某托交彌久申以姻眷惟道義之長  
存慨死生之倏變驚英魂之長往知夜壑之靡旦  
聊撫筵而一痛徒有淚之如綫尚饗

名宦祠祝文

仰惟先哲惠此士民化雨仁風久而如在某繼後



塵雖其有愧而不敢不勉也歲事聿修登薦菲薄  
其尚相予於冥冥以終大賜尚饗

鄉賢祠祝文

仰惟先哲隱以德顯仕以業著卓然風於百世垂  
範至今士民歸厚豈某之能教翳鄉先哲是賴薦  
誠俎豆匪以爲報也尚饗

衡府紀善周公祝文

維臣行義維學明倫公昔就義實以茲爲死所匪  
直自擇其所歸亦以教忠也某職忝作人敢忘祗

事酒清牲瘠惟公其歆之

鄭介夫先生祠祝文

新法之出不俛而隨一拂以歸違世所馳顛沛流離以蒼生故一話一言不忘君父老壯一節信於是邦况其有書流傳者長

春日載揚  
秋露祁祁

祇薦樽酒以

慰邦人匪直愚守尚饗

黃侍中祠祝文

惟公闔門臣死其君婦死其夫女死其父母而臧獲輩死其主可謂與日月而爭光隻古今而無對

者已顧瞻遺丘寅薦罇爵匪直守土之責抑以從  
邦人之願尚饗

耿師新祠成告文

伏惟我師鍾靈三楚爲範一時挺立獨出唯道是  
師鸞鳳開九苞之翼江湖澄千頃之陂始持符而  
督學爲東南之羽儀當長夜而秉照閔迷塗而授  
綏釋衆言之牴牾排異學之喧呶鼓大塊之噫氣  
盡萬竅而一吹譬星暉而嶽峙爲羣望之所歸念  
金陵之奧區實蒙教之所始義日煜而光華仁風

揚而披靡卽山祖與水涯長沾丐而未已某等早  
承訓誨偏沐恩光愧館宇之弗稱爰改卜於宮墻  
幸俎豆之在茲儼音徽於不忘托椒漿而一奠奉  
明靈之洋洋儻可施其默牖知無間於存亡尚饗  
奉楊道南主入祠告耿師文

昔孔子作人必有從游之士妙契師傳共相關發  
異日祀於瞽宗亦與享焉我師振鐸南服道南楊  
子寔始從之道岸先登仁風丕振二三子之興起  
寔惟厥功敬筮吉日迎主於我師之側神爽森越

儼如負牆尚望冥冥之中共爲匡弼俾二三子不  
終墮於迷塗謹告

奉楊道南先生入祠祝文

先生性真洞契行誼夙修明足探微和能釋吝同  
志者翕然曰師門之顏子也先師祠宇巋然以時  
秩祀所當祔食者非先生其誰謹卜吉日迎先生  
而妥靈於茲嗟乎名宦鄉賢旣分曹於兩廡上臨  
傍質復聚首於一堂尚冀冥冥之中擊蒙警惰俾  
某等無終愧於斯文謹告

祭少京兆黃雲蛟文

惟兄曠懷厚德軼於人倫匪仁弗依匪義弗敦曷  
遠曷近心冥則親雅尚名教素遠權利夷險匪虧  
通塞一致澄清淮楚風裁昭宣懲褫賞善勸學興  
賢遐邇肅服靡不翕然有識歸心王佐之器胡不  
百年而止於是人之云亡邦國殄瘁嗚呼傷哉憶  
歲丁酉羣姦亂國濁斯溷清曲不容直余撓其鋒  
首見斥謫兄也不平憤極而號欲棄其官明我於  
朝余曰宵人如燄之熾及其消滅頃刻可俟斂身

而退樂道丘園疇云毒予莫喪予存迨兄南來疏  
薦及予堂堂昌言光我衡廬事雖不行何日忘諸  
兄晉列卿位望赫奕歸志時興濡忍未決有書言  
懷第俟余出豈期余衰莫副兄意乘雲行泥彼我  
何異猶思相勉策足道津胡然轉盼喪此德人金  
山晤語存亡遽分嗚呼傷哉分則弟昆誼切骨肉  
兄歸重泉弟應匍匐病足支離無繩自束惟以兄  
德載於銘詞昭示後人千秋永垂庶幾慰兄其在  
於斯嗚呼傷哉尚饗

焦氏澹園續集卷之十九目錄

四言古詩

答季立先生十二章章六句

焦氏澹園續集卷之十九目錄終

澹園續集



焦氏澹園續集卷之十九

四言古詩

答季立先生十二章章六句

東寶曰箭南木惟喬君之代興武鬯文條抗心希  
古於時鮮交顧子淺材乃辱英盼如蘭之馨歡言  
寤歎投以篇章絢焉有爛過逢非久樂踰舊知詩  
窮古始易究庖羲嘉言耳玉屑其霏翔鴻翩如  
俄焉東邁約以卜鄰窮年卒歲顧步懷思慮其不  
再昔之往矣朱華未稀今其來思雨雪淒其揚舲

攬轡慰我調饑古之神遊八極可越不伎不求奚  
往弗獲氓之蚩蚩繫此徽纆春冬閱歲墳簷比音  
或挽或推升高汲深何以勗予曰惟洗心玄覽未  
滌純白其傷濯之罍之江漢秋陽汾涸洙泗以遡  
軒黃昔人所歎難在知非多言兆釁好勝者危微  
君諒直疇爲予規交以澹成心繇道契連城非寶  
三旌詎貴心期一豁塵滓可棄歲云暮矣言息其  
廬良書坐擁林水翳如何以寄懷濁酒一壺聊綴  
斯章如桃報瓊詞竭氣殫含意未終誰爲來者契

此素風

焦氏詹園續集卷十九終

詹園續集卷十九

焦氏澹園續集卷之二十目錄

五言古詩

除草

賦得鳳凰臺

恭誦 宣宗皇帝御製翰林院箴有述

送區用孺使淮府便還廣州

贈賴士直

贈汪三江

題先師殿前檜

題先師書樓檜

題子貢手植楷

奉同黃鄭二工部高民部遊城北諸山賦得

三首

焦氏澹園續集卷之二十

五言古詩

除草

幾迴憩吾圃春色明郊原嘉樹日亭亭  
翛然幽意存如何旬日內惡草忽以繁  
芒刺在我目荒穢盈丘樊青青松竹姿  
埋沒在中園嘉生日爲塞爾態翻自誼  
爾誼何足道柰此芳華寃呼童荷鋤往  
誅鋤勿辭煩滋蔓非難圖要在去頑根  
頑根隨手盡惡類焉能蕃籬籬頓清曠  
始覺松桂尊因知除惡

本古人非空言吁嗟世固然吞聲復何論

賦得鳳凰臺

高臺鬱嵯峨三鳥鳴翩翩兼之萬羽從下上青林  
外何年去不還江空臺自在瞻茲威鳳姿豈以稀  
見貴止必梧桐枝飲必瑤池派矧伊臺中人高風  
擅絕代因時一來儀功成謝塵籟道從神理超賞  
與崇深會振策凌紫蒼披襟濯松檜夜靜簫聲空  
風吹女蘿帶喟焉睇長川一往有深解行當千萬  
秋乘雲弄烟瀼

恭誦

宣宗皇帝御製翰林院箴有述

天闢圖書府深嚴不可窺榮光中夜起奎壁何陸  
離仰瞻梁木峻上有宣皇詞宸章旣昭回御墨  
何淋漓詞垣勒鑒戒侍從炳著龜首言綸綍寄中  
及講學資聞識充耳目幾務賴疇咨啓心仁義道  
指事唐虞時文章尚典則謀議嚴公私大哉王  
者言允爲詞臣師長跪再三讀中情凜以怡微尚  
夙所秉羞爲末俗規况茲樛櫟材甄收沐皇慈  
袞闕期有補直筆冀無疵願霈霖雨恩大慰原野



崑以斯潤色情上答高天知擊目還警心韋弦良在茲

送區用孺使淮府便還廣州

當年同擢第文字總馳名共唱陽春曲多君金石聲  
玉署曉同趨金閨晝長揜橐筆互先後鳴琚日游  
衍忽以維城重新辭寓直班人經彭蠡澤帝賜紐  
馳環百粵指歸塗棠花已含笑熊軾海潮迎高門  
朱戟耀鶯囀燕客遲晝靜知夏好故鄉豈不樂承明  
應念歸撫景易遷變論交難久違無令三

五夕長憶謝玄暉

贈賴士直

自予棄纓綬窮巷長栖托世氛中道屏夏氣南榮  
薄墳籍仍舊業榱桷無改鑿林臥閱代興天遊恣  
寥廓鄒子人中豪相期在林壑每尋安成夢未果  
山陽約君爲及門人意叶忘瓠落扁舟訪衡廬投  
我平生作雅韻鬱瓊敷新詞棼綺錯鵲起待機緣  
螭屈豈沈莫時至當奮飛乃展胸中略吾衰久矣  
夫抗志思絲邈纏牽難遠步肉食鄙葵藿君其振

英風一洗時流作歸來問真諦終畢林間諾

贈汪三江

卜居秦淮湄在市罕人跡開函讀古書皎日照東  
壁雅懷夢亦清霽景氣彌適鴻冥弋何慕豹隱文  
自澤執戟良已疲結綬定奚益詎如栖一廛偃仰  
樂晨夕霏霏竹筍名藹藹蘭陵席蘋洲望已騁荔  
帶紛可襲誰云仙路遙修塗逝言陟窈窕駕青驪  
相將訪黃石

題先師殿前櫓

蕭蕭素王宮秋日冷石殿凜然中庭檜氣壓千夫  
觀風聲共葳蕤雲色起蔥蒨不有後凋者那堪奉  
閒燕

題先師書樓檜

高樓離紛華嗟此檜樹獨風烟閱居諸霜雨沐昏  
旭不知歲時改保此亭亭綠詎如書帶草閣下自  
芬郁

題子貢手植楷

峩峩楷樹枝移根南澗底依歸夙所尚封殖聊自

寄一日脫巖阿千秋出勢翳嗟哉築塲人終古有  
餘庇

奉同黃鄭二工部高民部遊城北諸山賦得三  
首

嘉石閣

層崖闕長陰細路緣絕巘梯雲見高閣停策清眺  
展嚴霜凜秋氣飛鳥澄湖淺嘉石羅前榮小大紛  
仆偃天霽嵌空出水脫林薄晚非日漱石流老懷  
寄高躋況此盈樽酌同心恣游衍慮澹物已遺境

閑心自遠悠悠弱喪情一晤得所遣

梅花水

雲林入清深陵谷互吞吐窈窕轉幽壑突兀開淨  
土南峰天一壁峭嶇經鬼斧寒潭海眼深黝黑自  
終古龍潛知何年駭浪思一鼓來遊二三子冥摅  
共軒舉一勺試甘冷稍稍清肺腑何當築其傍餘  
潤及稼圃商歌濯塵纓長此成賓主

幕府寺

幕府敝名藍揭來年祀永蘿壁貯晴嵐松門耿疎

影緬惟始興公艱危手自拯青山閱人代如一伸  
臂頃摩娑盤根槐甲子誰記省修梁巨橫津蒼烟  
冒危嶺澄波餘習淨瀨氣深心領層臺展衰步欲  
輟行復騁短晷意未紓裴徊戀清景

焦氏澹園續集卷之二十一目錄

七言古詩

長歌行送羅生尚德北上

莊肖坡七十詩

吳君生日贈以酒作歌侑之

題黃山烟樹圖爲邵果齋內人壽

題先師手植檜

分得洗藥池壽王子美丈八十

題受公石上看雲圖



豔雪堂詩一首有引

莊肖坡七十詩

昨夕泉山春鼎來東風淡蕩巖花開逶迤百尺神  
仙室縹緲三花玉女臺莊翁學道臥烟霞采藥尋  
真服九華夜逢王母詒蒼珮朝謝諸生捲絳紗堂  
有慈親年九十渥顏猶帶嬰兒色對客何妨每飯  
蔬有子不煩親捧檄賢孝承家有素風古今母子  
將無同稱觴不道山川隔想見窻戶開青紅賀客  
續紛踵相接座有金盤馬珠勒十分美酒壽千齡  
笑看醉紅潮玉頰雛鳳高飛太液池翩翩時繞上

林枝多翁獨立綠山頂長看鷓鴣集瑣埤

吳君生日贈以酒作歌侑之

前有一樽酒上君千百壽生逢強健時代是昇平  
晝酣觴聊可破窮愁身名那用悲前後春風二月  
花滿枝含情不飲將待誰越女紅顏發巧笑詞人  
綵筆相追隨興來相對一揮盞醉中得趣王侯卑  
君不見梁苑鄒陽擅文雅幾載曳裾趨闕下可憐  
衆口銷人骨束縛遭獄吏罵又不見李白才華  
不世雄夜郎一去重飄蓬讒詬焚焚滿人耳有如

落葉鳴秋風白衣蒼狗元顛倒二子輒軻安足道  
黃梁得喪總浮雲何事區區挂懷抱延陵吳生二  
子敵十年猶困風塵色鳳翮凋零霜雪摧吳鉤蠹  
蝕塵沙黑當年得意吐虹霓一朝失路藏荆棘片  
言墮地鬼呵護精氣摩空人不識我勸君酒君莫  
辭風雲變化會有時青春好著東山屐他日飛騰  
未是遲

題黃山煙樹圖爲邵果齋內人壽

黃山高凌紫清七十二峰煙樹橫軒皇曾此煉

金液手攜玉女朝瑤京遙遙一去幾千載猶有真  
風至今在梁鴻埋照世不知翻因德曜留光彩綺  
筵行酒宵向分舉杯相邀鸞鶴羣翠微渺渺丹霞  
接彷彿靈璫響綠雲大道希夷亦等閒仙源只在  
故鄉間莫如弄玉高臺上一逐蕭聲定不還

題先師手植檜

關里老檜長百尺根如車輪榦如鐵壯夫連臂未  
可抱羣鳥高飛不敢宿蒼雲亘地出丰神大雨翻  
空洗顏色人言此檜二千年曾是宣尼手親植當

時未爲大廈用手澤至今人愛惜孤標兀兀撓雲  
霓豈與衆材爲匹敵寒翠猶存劫火餘榮華詎羨  
流星疾日月無窮萬古垂三拜下風長嘆息

分得洗藥池壽王子美丈八十

方山東畔開仙靖樓觀參差冒危嶺雲母膏浮碧  
玉池茯苓香沁空青井昔時仙子林中住一壑烟  
深洞門閉寶氣中天夜夜橫猶識當年洗丹處王  
喬自是仙翁儔池上輕雲接地流未肯朝天台絳  
闕時聞縮地遊丹丘椹褐匡牀成隱居養魚種樹

混樵漁題詩此日看圖畫  
搥杖終期問素書

題受公石上看雲圖

廬阜紀山帶潯陽詠奇峰  
何如天台山有石森巖  
從石上流雲互明滅  
豔若朝霞皎如雪  
小展蒼茫萬頃迷  
旋收突兀千崖出  
主人自是湯休儔  
碧雲之句喧詩流  
磊落胸中着丘壑  
翻飛筆底騰龍虬  
玉雪爲神眊點漆  
不道生平有奇癖  
怡雲旣學陶隱居  
又似米顛能愛石  
寫圖邀我歌短詮  
雲閒石冷共逍遙  
從知虛澹藏禪味  
宴坐空巖昏復朝

豔雪堂詩一首 有引

雲浦侍御園竹兩度着花大如瑞香色紅五葉  
而中吐黃穗芳冶可愛因以余書豔雪二字顏  
其堂而命余賦之昔韋集有云清詩舞豔雪孤  
抱瑩寒冰是豔雪古有是語但未以擬竹耳夫  
雪之豔非韋不能道柳花之香非太白不能道  
竹之香非子美不能道以豔雪擬竹非侍御亦  
不能道也媿余語凡近不能稱此題耳

江陵有地如淇澳不用耕雲并種玉隨風一夜長



琅玕雪華豔豔生浮綠回看滿樹玉櫛鬆弄雪攀  
林興不窮采采已來丹穴鳳鱗鱗欲化葛陂龍肯  
學成蹊桃與李強勻顏色東風裏青腰素女試銀  
粧冷絮輕瓊差可擬君不見嶢谷當年斫一枝試  
吹六合回春姿

唐人雪詩輕瓊冷絮舞長空

焦氏澹園續集卷之二十二目錄

五言律詩

送王行甫還黃州

挽韋生堯臣

羅生挽詩

銀翁齋中各賦一物分得談玄玉塵

劉節婦

齊王孫挽詩

送劉玉阿謁湖州先莊裏新祠二首

送公露奉母之南曹二首

贈別二首

齊王孫園餞別惟禮二首

送劉宗魯還四昌兼柬尊人君東先生二首

焦氏澹園續集卷之二十二 目錄終

焦氏澹園續集卷二十二

五言律詩

送王行甫還黃州

當代論詞賦君還第一流如何雲夢客不作上林  
遊世以雕龍著名堪繡虎牧漢庭楊意在莫爲釣  
竿留

挽韋生堯臣

死自浮生事嗟君倍可憐弱齡辭伉儷短世背貂  
蟬乍失仍疑見重逢未卜緣祇餘雙劍在龍氣斗

牛懸

羅生挽詩

文儒多儉狹怪爾太飛揚跋扈人間世三千弟子  
行鳴鞘空絕技擊石不餘光李廣時難遇無言自  
惋傷

銀翁齋中各賦一物分得談玄玉塵

本自荆山質移來講席揮欲因開覺路聊以息塵  
機白與珠華映玄隨玉屑飛松枝那足貴空自惜  
張譏

劉節婦

粉暗辭羅綺，釵寒失鳳凰。  
賦堪悲暮日，心欲結秋霜。  
列女班荀並，男兒嬰杵行。  
綸音一褒錫，千載播芬香。

齊王孫挽詩

憶昨同難弟，池亭嘯詠時。  
共看春草發，俄聽夜烏悲。  
琴酒虛朋輩，笳簫咽路岐。  
祇餘叢桂在，留恨滿荒蕪。

送劉玉阿謁湖州先莊襄新祠二首

楓陞勲名重孤城風義親英雄無處所蘋藻薦遺  
民白日晴沙冷青山片石新寧知百年後悽惻弔  
雲孫

迢迢二千里扶老向江山雉乳風流遠熊轡像設  
閑竹深喧暮鳥花靜掩春關應有門徒在相逢話  
舊還

送公露奉母之南曹二首

將母秋原發承恩晝錦行土風時入詠月俸足調  
羹畫省雲爲署澄湖玉作京懸知紆綬處信美重

含情

聯珮趨青瑣之官住白雲幾思花下醉其奈席前  
分作客應誰共還鄉獨羨君羈栖差可慰詞賦鎮  
相聞

贈別

寂寞楊雲宅清溪隱徑賒閒門得之子問字一停  
車杯帶寒流淺山臨夕照嘉無言歸鞅緩前路及  
鶯花

槐市衣冠會風流今在茲因思公子日得副晚春



期畏鵬悲吾老爲鵬嘆爾奇定知懷玉者高價動  
良時

齊王孫園餞別惟禮二首

故人何所往迢迢燕市過渚花行際少江樹望中  
多鴻漸因風上鶯聲近日和騫騰知未遠去路莫  
蹉跎

菜園含薄霧潭水漾輕陰好鳥啼芳樹清歌聞隔  
林長途今日始幽事幾人尋不謂離居意衰年覺  
倍深

送劉宗魯還西昌兼東尊人君東先生二首  
地迴煙霏合門深松桂賒風塵能蹙至衰白轉光  
華露砌琴初愜霜林菊自花晤言知不易延賞坐  
昏鴉

吾憶匡南老端居歲序遙如何龍臥穩尚阻鶴書  
招度與山王勝談應祖謝超雙魚來往易不斷九  
江潮

焦氏澹園續集卷之二十三目錄

五言排律

送黃博士宗商謫江夏

贈符卿徐君奉使鄭藩二十韻

送林咨伯奉使便歸莆陽覲省

卜孺人六十

許懷泉六十詩十韻

贈職方尊人偕壽詩

挽楊封君

余學士八十得子客以詩賀之余亦嗣響

壽鄒南臯先生二十八韻

壽參岳何公露二十韻

題南山精舍爲黃給諫賦

焦氏澹園續集卷二十三目錄終

焦氏澹園續集卷之二十三

五言排律

送黃博士宗商謫江夏

能文韓博士結綬五湖端出宰聲彌遠投身自  
寬虞翻仍遠地柳下亦卑官白璧逢人晚青松有  
歲寒循良看古史凋敝願時安正爾飛騰日無憂  
行路難

贈符卿徐君奉使鄭藩二十韻

屬籍恩波厚巖廊禮數宜簡書應日下使節竟疇

肩尚璽班方重承恩爾最賢價高雙白璧調逸兩  
朱絃石慶恭彌厲韋玄業盛傳清曹分鶴禁殊渥  
佩龍泉綸綍金臺出于旌宛洛懸列卿紆遠轡父  
老泣新阡鄭自維藩舊名因宗老先東平留善譽  
劉向有嘉篇小挫忠逾篤中還節更堅兔園勤采  
纈雪館費招延好賦梁王逝留賓穆醴遷皇情麟  
趾切卹典鶴書專祗役君遄發還鄉意暫便青山  
探古蹟丹笈挹羣仙勝地羈維釋高吟激賞偏寒  
帷瞻往路臨水惜徂川吳會浮雲外燕京落照邊

相思日延佇歸鞅早朝天

送林咨伯奉使便歸莆陽覲省

授詔辭金殿承恩戀玉墀名堪天北斗使向海東  
垂龍節詞臣重桐圭帝子私嶺雲迎舊路海月惜  
歸期况是題橋後兼之奉母時江魚供錦饌林笋  
薦瑤卮色養心難盡朝天分莫辭承明需著作還  
轡未應遲

卜孺人六十

槐市迎親日冷風引夏涼葵榴森戶牖歌吹動宮

墻枕扇隨溫養金籬重義方美談知待湛散朗欲  
齊王節以難危厲名因歲月燕天應開寶婺池擬  
接瑤觴忠孝家聲遠冠纓世澤長開是將麗藻願  
以祝高堂

許懷泉六十詩十韻

巖壑高懷在清泉日濯纓終湖臨別墅白首締深  
盟植樹先賢傳爲農東總名千金三自致七策二  
先成老覺孫謀重心知儒術精經能傳世業子欲  
振家聲羣從金閨器過逢玉樹清琴書淹短晷弧



矢照長庚黃菊如相勸青樽莫厭傾西風應不負  
彩筆正縱橫

喻職方尊人偕壽詩

家風南浦遠子舍上京開厨膳江魚入萊衣宮錦  
裁政曾三異上恩自九天來爵服郎官貴絲綸內  
史催典章馳盛代象緯燭中台緩以迎霜茂椿因  
足雨培庭闥增氣象風譽日招回磊落乘舟志端  
嚴斫柱材何人能作頌長命一添杯

挽楊封君

斯人巴蜀彥一日撿黃泉里開儀刑絕親知涕泗  
漣淳曾廻薄俗節擬邁前賢垂範橫經舊推仁解  
網先尊榮真不愧端雅獨脩然八十新開袞三千  
欲紀年 鸞書重寓目鳳德敢差肩令子勛猶壯  
修名遠邇傳巖廊精獻納甌粵重旬宣 帝念徵  
爲鑑時需說濟川乘風功逾起愛日夢常牽一別  
成寥闊孤懷柰渺緜鯉庭遺故帙蝸壁慘虛筵慟  
哭蠶叢路淒涼京兆阡摛詞從左掖遣奠出中涓  
鄰愛方休杵 皇慈更撤懸穹碑書寵渥 國史

采貞堅益部耆英傳華陽士女篇何人能繼作翹  
首誦摩鐫

余學士八十得子客以詩賀之余亦嗣響

人當弄璋日年是釣璜餘勝事從今覩奇聞到處  
無定知從孔釋詎欲比封胡晚出荆山璞欣披汗  
血圖照車成郢握歷塊匪轅駒合字相如大寧慙  
楊子烏夢蘭符朕兆擢桂快搏扶漫寫詩爲卷遙  
持酒滿壺年年湯餅會莫忘一招呼

壽鄒南臯先生二十八韻

霽日開家讌光風動客裾翠蘋涼影合丹嶂晚霞  
鋪杖屨時能至蓬蒿徑未蕪棊中安石墅花裏步  
兵厨憶昨登朝日英風絕世無閭豺難避路射隼  
輒彎弧必使三綱正寧甘九死扶姦諛心欲碎忠  
義氣全乎其柰投明月因之泣暗途七年臣節苦  
萬里客星孤博望辭門籍巖廊轉化爐掖垣煩領  
袖朝列仰規模推轂從輿論持衡繫廟謨青蒲常  
切諫白下又長驅講德標新義陳詩藹故都地靈  
回涸轍天部接亨衢擺落嫌疑跡從容肝膽輸詎

因垂翅後坐令好音殊價重難沾玉恩睽每報珠  
鍾陵留几簞鑑水足尊鱸歸棹堪龍臥閑庭任鳥  
呼飛揚醉白興寂寞草玄徒問字羣多士談經半  
碩儒門歡候客稚谷繫食場駒時事紛披甚朝端  
事業需騫騰應不遠倚伏自難誣磊落廻瀾志纏  
絲補袞圖誰操狐馬筆授簡爲全書

壽參岳何公露二十韻

上日華筵啟高門盛事偏三傳皆甲第諸客半貂  
蟬納屨玄黃集稱觴雅頌宣蘭燈輝接座桂魄朗

遙天憶昨公車日看君射策先清朝推翰墨畫省  
比神仙賈誼經邦疏相如諫獵篇雲霄方羽翼江  
海各風烟振玉洪都路擬金秦望顛千家窺驛舫  
五馬飲鼉泉便了湖中事時參物外禪行春烏反  
哺問俗犬安眠才大思兼濟時違忽棄捐寒裳聊  
自適叱馭任人前圖史臨谿閣桑麻負郭田曾栽  
松偃蹇亦種竹嬋娟結社交從素閑居草足玄頽  
峰欣酌羽流水恣鳴絃勝賞追前輩雄圖付後賢  
從今巖壑穩臥聽谷鶯遷

題南山精舍爲黃給諫賦

見說南山勝名儒少日留一從登瑣闥幾度憶滄  
洲棟宇千齡接山川累世收貽謀承往日肯構詎  
常流舊草辰占麗深松歲不秋煙霞互吞吐魚鳥  
接沈浮跨木長橋遠聽泉曲澗幽寧知千載後得  
與祖風侔水月通三昧圖書富九丘飄搖中散駕  
磊落仲宣樓泉石鄉關夢艱危社稷憂一疏期效  
賈三策合追劉壯擬姬圖永奇思舜藻求卷阿鳴  
鳳鳥斥鷃豈爲儔





焦氏澹園續集卷之二十四目錄

七言律詩

初還退園作

送秦後儀還江陵

吉祥寺桃花園一首

楊鍊師恩例冠帶

題李公子喬松圖稱壽尊君臨淮侯

送吳伯恒太守之杭州

潘去華弟隨兄之都生日贈一首

項烈女

朱鳳岡翁恩例冠帶

送王計部視學河南便歸姑蘇二首

送魯幼齊之龍游

范叟

送譚中丞撫蜀便歸覲省

壽林君

別朱平涵宮諭二首

潘懋德生日同友人數輩觴之余賦一詩

方思川五十

余司成八十

王與竹方伯七十

顧體庵兵備七十

贈汪生

送馬蒼麓參岳之貴竹

送張博士還安陽

筠塘郡伯治最當徵兩臺從士民之欲爲請  
於朝得留久任聞者喜而賦之余亦繼作

李蘭溪六十

送曹能始

題李氏古勝園

送彭景從

和謝比部何園懸燈賞牡丹四首

金少源生日

贈金少源

江月軒爲石民部賦

贈吳弘宇

送李叔操歸上黨

贈永慶僧

贈何公露

張少參六十

壽楊默齋七十

壽楊慎齋六十

陳未齋年兄八十

壽郊山楊翁八十

送沈鳳岡之高郵

沙隱集卷之四  
題董望峰行春圖

劉句容母夫人八十

王碩人壽章

題羅月軒爲陳蓋卿題

喬世昌給諫過訪有作二首

壽朱襟湖六十

李氏山園作

贈李公子

徐園賞頻婆花

壽吳肅卿

贈凌森墨戶部暫還永川

贈凌亭倩

李封君壽詩

潘懋功總兵六十

送董孝功歸省

焦氏澹園續集卷二十四

七言律詩

初還退園作

咫尺柴門卽水濱，無邊清興逐時新。  
鏡中白髮堪知我，坐上青山自可人。  
老去服車空有志，愁來彈鋏不因貧。  
寂寥賴是遺編在，擬草玄經筆有神。

送秦後儀還江陵

青春山郭亂花飛，忍見天涯送爾歸。  
三楚風光行處盡，片帆烟渺座中微。  
浮雲極目愁看劍，問字何



人獨掩扉懷抱欲傾嗟未得相將容易寸心違

吉祥寺桃花園一首

隱隱花宮北又東幾株紅樹翠微中短扉流水非  
秦世淡林輕粧出漢宮暈減自憐宜曉日嬌多翻  
更怯春風重來欲記天台路祇恐仙源不易逢

楊鍊師恩例冠帶一首

一道天書出紫宸清都何意播餘芬朱旛欲向雲  
中度毛節俄從日下分讌去幾隨青鳥使書成曾  
舉白鵝羣年來亦有蘇耽興願借仙人玉笈玄

題李公子喬松圖稱壽尊君臨淮侯

三山嘉樹鬱蒼蒼下接粉榆是帝鄉雲氣直蟠千  
里勢露華遙自九天長陣成鵝鵲春藏影旗偃龍  
蛇夜有光報國片心知未冷滿園鱗甲動冰霜

送吳伯恒太守之杭州

窈窕澄湖十里光幾年幽夢寄滄浪風煙莽莽林  
逋宅雲木蕭蕭冰壑堂蟋蟀經秋生別恨芰荷他  
日或同裳何人不淺郗超興爲傍清溪架竹房

潘去華弟隨兄之都生日贈一首

揚鑣曾逐祖生鞭，弧矢雙懸日月邊。  
國士祇今堪伯仲，酒人那復羨幽燕。  
春明上苑供浮白，月滿西山伴草玄。  
樹底荆花君自惜，肯令風雨妒芳妍。

項烈女

未嫁从夫古所敦，千秋那不愧貞魂。  
琴隨子敬甘同絕，劍許徐君不負言。  
璧月乍沈鸞鏡影，銀河長斷鵲橋恩。  
空餘涕淚鴛鴦冢，歲歲梧桐他自繁。

朱鳳岡翁恩例冠帶一首

東風七十九回春，曾向先朝作外臣。  
何意丹青天

上至轉憐華髮鏡中新  
高朋滿座懷仍壯  
濁酒連牀計未貧  
顧我淺才無以報  
廿年門下愧情親

送王計部視學河南便歸姑蘇二首

東風擁傳外臺居  
十載聲名在兩都  
豈謂青雲搏勁翮  
欲從滄海問遺珠  
筆搖嵩少春長住  
屨滿漳河興不孤  
此地弦歌多勝蹟  
看君衣鉢紹前儒  
一春多病楊長懸  
又是詞臣攬轡年  
謝氏衣冠堪擅世  
旌陽眷屬總登仙  
袖中刺字慙相避  
馬首離歌倍可憐  
靈蹟君還知未遠  
將因一訪紫芝篇

送魯幼齊之龍游

神明茂宰古來難  
姑篾逢君政自寬  
不憚舟航衝暑熱  
爲憐父老遲江干  
金陵雲隔三衢嶺  
瑤草春生七里灘  
到日登臨多暇豫  
西風應憶竹皮冠

范叟

松花滿泛酒杯濃  
冉冉鸞笙度碧空  
香社聲名胡李上  
商巖杖屨綺園中  
清池洗藥時窺月  
白晝遊仙或馭風  
莫厭過從頻獻壽  
百年今復許誰同

送譚中丞撫蜀便歸覲省

仙郎親捧紫泥書歸路遙馳駟馬車  
翟服寵光開日月綺筵歌舞動林廬  
已看鵲起隨金印更羨烏飛傍板輿  
千里承懽君莫慮錦城到處有江魚

壽林君

華髮飄然六十時當堦玉樹挺奇姿  
久知晉代推懷祖自合荀家有叔慈  
老去圖書侵座滿庭虛花竹傍人移  
牆頭一片鍾山色日爲閒人送酒卮

別朱平涵宮諭二首

急管清絲祖席催鋒車千里帝京來  
燕臺合是彈

冠地鶴禁還須載筆才落日孤帆江外影浮雲遠  
客望中哀赤霄不盡芒寒色夜夜文星接上台

舊交零落幾人存白首何期共酒樽琴釣同心聊  
此日雲霄比翼敢重論寒江立馬愁將渡深樹啼  
鶯獨掩門老去荷鉏君莫念春來雨足邵平園

潘懋德生日同友人數輩觴之余賦一詩

威鳳聊因翠篠留結鄰閒臥一山幽未妨嘉客淹  
梅雨况復清樽對麥秋元亮賦詩經絕壑季常傳  
業在高樓時來莫歎封侯晚再上菑川尚黑頭

方思川五十

曾開園囿帝城傍樓上山川指顧降賸有琴書留  
几簞閒邀嵐翠入軒窗深秋轉覺黃花茂縱步長  
看白鳥雙四十九年如過夢一樽何惜共銀缸

余司成八十

寰區八十自由身蚤歲聲名動紫宸不戀班聯參  
日月每從坐隱息風塵文章有價傾三事桃李成  
陰在兩均聖代祗今求舊切未妨重載釣璜人

王與竹方伯七十



烟月秦淮一曲回綺筵新向鳳城開鶯花上國遊  
仙路岳牧殊方報主才香薦山櫻清几格影搖銀  
燭勸樽罍閒身何必扶鳩杖乘醉時登郭外臺

顧體庵兵備七十

憶從潼谷賦歸歟東府長停憲使車骨相一生金  
印肘功名廿載皂囊書縱懷謝傳園棊日選勝羅  
含徙宅餘容髯况禁春事在夜堂莫放綠樽虛

贈汪生

風塵誰復縱閑身爲愛名都遠卜鄰鍾阜高懸雙

翠江流遙結一谿雲竹林雅詠山王並栗里清  
言祖謝臻最喜開樽逢五月石榴花發是嘉辰

送馬蒼麓參岳之貴竹

一醉歸岐金屈卮看君事業有前期揮鞭欲繫名  
王頭草檄爭傳幼婦詞遠地風猶銅柱紀舊遊星  
散簪冠知河橋楊柳青無盡矯首停雲有所思

送張博士還安陽

江干相送夕波寒滿望離離木葉丹世路艱危新  
稅駕人情翻覆幾憑闌乍辭赤芾名偏重三仕清

朝髻未殘聞道後堂多樂事筦弦誰復借餘歡

筠塘郡伯治最當徵兩臺從士民之欲爲請  
於朝得留久任聞者喜而賦之余亦繼作  
徵詔端因黃霸裁主恩還借冠恂來桑麻久媚  
褰帷色琴誦應饒入室材白晝郡堂留岸幘清時  
山郭憶停杯懷賢戀德無多日佇擬勲庸列上台

李蘭谿六十

芍院風物共徜徉解組翻憐意氣長松菊乍開彭  
澤徑畫圖重識輞川莊端居歲序頻相過舊業田

園鬱未荒羣從幾人饒彩筆不妨杯酒照琳琅

送曹能始

十年觴詠幾追游唱罷驪駒不可留清世未煩憂  
蜀道壯懷時復攬吳鉤孤帆雲渺江天暮三峽風  
回壠樹秋谷口高賢知在否將因問俗一相求

題李氏古勝園

名園十畝隱樓臺異代曾栖作賦才曲水春從青  
嶂落遙山曉帶白雲來堂開杉色千重見花擁禽  
聲百和迴此地羣公多置酒幾人懷古日悠哉

送彭景從

惜別河橋楊柳垂石城春色正遲遲壯懷準擬千  
秋業遠道其如萬里思未愧金陵稱末契早從玉  
署挹芳詞二京雲樹多佳麗轉轉遷鶯得上枝

和謝比部何園懸燈賞牡丹四首

欲憑國豔慰衰殘垂老猶來就藥欄把酒不辭花  
下酌移燈還向醉中看青輝散彩春增麗丹靨扶  
香夜未闌爲問品題誰第一正封詩價動長安  
高懸銀燭傍花王冉冉猩紅出短牆祗覺豔多消

酒力不緣暈減借燈光氤氲寶曆開香霧宛轉仙  
衣弄晚粧自是維摩能解脫未妨同坐散花場  
清宵紅燭照高枝幻出花叢一段奇色借瓊甃初  
泛泛影搖珠樹半離離文君窈窕當壚日羸女留  
連窺鏡時一自新都懸賞後幽歡曾許幾人知  
瓊島移來手自栽更煩火齊照春臺花如不夜城  
中見詞向清平調裏栽雲朶鱗鱗明錦幕露華濯  
濯映珠胎白頭轉覺鍾情劇扶醉深更未擬回

金少源生日

美酒香茶興不踈筵開六十九回餘帳中並受通  
儒業圯上親傳孺子書玉樹歌殘桃葉渡金壺人  
醉藕花居莫言汎宅浮家事臨水看雲日晏如

贈金少源

三楊當戶此開樽雅況如君可易論結客才應無  
上駟談經名已動中原白移山帶芸生潤綠滿書  
帷草漸繁十載賦成還自愧未堪重過子雲門

江月軒爲石民部賦

絕壁臨軒接太清澄江霽色望中平不妨太史占

龍氣自有仙人集鳳笙皎月半空紅樹迴長虹雙  
指畫樓迎定川解送閒人酒簫鼓方舟處處聲

贈吳弘宇

菟裘自卜隆中地麟閣何煩身外名樽酒欲開山  
郭淨爐熏未散午風清行邊勝具同玄度老去高  
懷學向平况是仙郎稱玉潤閒居相侔著書成

送李叔操歸上黨

頻年京輦暫徘徊此去壺關首重回雞肋未堪糜  
國士羊腸寧復傍時才青山夢遠家還到白雪知



稀調轉哀賴是淵明能寄傲不將琴酒負歸來

贈永慶僧

蕭森松竹對窻疎謝傳荒墩入望餘  
少日登臨成勝會老年蹤跡墮空無  
祇將禪誦供僧臘不礙菩提混世途  
還憶太虛遺意否一輪新月定山孤

贈何公露

滿貯圖書博雅堂閒攜絲竹輞川莊  
栽成柳賦欺鸚鵡買斷茶泉得鳳凰  
洛轡倚塵矯水上秦簫吹月度花傍  
稱觴莫惜留賓醉更數從頭三萬場

張少參六十

支干遍歷逢初度恰是嘉辰九日來朱紱暫拋閑  
把釣黃花相伴且銜杯頌聲曾入華陽志召節仍  
從薊北催一壑風烟知未穩看君頭角自卿材

壽楊默齋七十

朝看青鏡未顏顏都付光陰酒醖閒花雨乍飛秋  
氣淨松風相對午雲閒三山江上供吟眺五老林  
中待往還知有長生真訣在飈輪鶴駕許追攀

壽楊慎齋六十

年將六十解天嶸白社經行不憚勞貝葉千函龍  
藏古蓮華九品塔輪高依人馴鳥多栖鶴入供新  
枝已獻桃不向一期論果報泰山滄海等秋毫

陳未齋年兄八十

憶從蚤歲賦歸田白壁青山澹晚烟笑指梅花開  
壽酒靜看椿樹數流年壯懷每放登臨後吟興何  
孤醅酌前知是淵明遺意在頻將風物記斜川

壽郊山楊翁八十

六詔山園長者家檳榔陰滿樹交花逃禪有興投

蘭若壯志難消視莫耶燕喜當春將進酒  
纔歌入夜雜鳴笳承歡況是仙郎在海屋  
籌添未有涯

送沈鳳岡之高郵

共折梅花送別筵江天何處不堪憐  
烟低邵伯當年埭月上邗溝第幾船  
才美衆歸金匱筆途長未暖廣文羶  
醉來莫嘆逢時晚賸有諸生貰酒錢

題董望峰行春圖

莫道閒門雀可羅行邊華髮媚春蘿  
自探鴻寶身偏健遙指青帘興轉多  
方外定堪司馬老田間誰

訖故侯過琵琶別有新翻調不唱平原柰樂何

劉句容母夫人八十

豔舞嬌歌間早梅北堂今夕綺筵開何人不羨周

官學

華達母精周官詔爲學者師

有子真成漢吏才婆女自增

玄象色麻姑親擗紫麟來華陽亦是神仙宅欲借  
流霞泛壽杯

王碩人壽章

天風縹緲度雲璈知是君家薦碧桃錦席初開青  
鳥下華燈欲吐婺星高蓬壺秋爽催花氣海瀝雲

深長鳳毛斟酌莫言難盡意壽杯擬借廣陵濤

題蘿月軒爲陳蓋卿作

新秋爽氣恣徘徊露下城隅集上才萬里賸留明月影一軒還向曲蘿開王修名理餘初地李白詩篇有廢臺形勝不殊遺韻在勸君長望且銜杯

喬世昌給諫過訪有作二首

江天無盡渺愁予一日勞君問索居丰采掖垣曾抗疏交情澤國幾栽書夢中雲樹三秋杳望裏鶯花六代餘隨處山川堪寓目未妨樽酒暫躊躇

二十餘年一見君人生聚散總浮雲向來肝膽知  
猶在世上風波不可聞走馬踏花歡晝永盤龍刻  
燭詠宵分明朝其柰河橋別悵望城西又日曛

壽朱襟湖六十

坐對茗溪玩物華偶因流水見桃花池塘草長生  
幽夢鴻鴈雲深傍淺沙黃綬久拋閑對酒白眉人  
望靜餐霞忘機自是長生客何必尋仙泛海槎

李氏山園作

名園尋壑復經丘載酒過從事事幽桃李香中聞

鳥語薜蘿陰隙見江流青春不醉無三日畫閣微  
歌定幾籌一自王孫開別第鳳城花月不知秋

贈李公子

貂蟬門閤斗星懸公子才名世所賢已見銀鈎能  
邁衆更披玉海締忘年蓬山舊約傳青鳥水閣新  
涼啓翠鈿叢桂垂垂堪載酒不妨時費買花錢

書稱銀鈎黃尾張  
融聚詩文號玉海

徐園賞頻婆花

豔豔頻婆媚晚空雕欄何意一樽同從知三月王



家種移自千花佛界中薄暈最宜新着雨生香常在半含風岑郎自覺塵勞在擬賦優曇愧未工

壽吳肅卿

誰折黃花薦綺筵滿堂賓從盡彈冠署中油幕行如寄湖上明霞秀可食不爲風塵違嘯傲每從尺素見平安五千舊是牀頭秘遲爾紅顏生羽翰

贈凌森墨戶部薨還永川

西風叢桂一升堂又見河梁舉別觴舊雨每勞紆短屐福星行復照何方雲轡挾暝歸途壯汀汜含

霜一水香題柱盛名君不忝漢庭誰不重田郎

贈凌亭倩

一望丹楓影欲酣皎然瓊樹坐相參毛從渥彩知  
爲鳳絲入奇青不道藍夙惠衆推靈寶貴清言思  
就阿戎談蜀都賦手憑誰繼遲爾文名播日南

李封君壽詩

壽星光彩動初陽特地筵開夜未央頓覺浮丘回  
淑氣坐令晴雪媚飛觴臺郎應節書雲物令子趨  
朝捧御牀鶴髮龍章誰不羨天時人事意俱長

潘懋功總兵六十

廿載馳驅南北遊，鸛鷺初斂太平秋。  
未須更借君王箸，且喜新添海屋籌。  
羊嶺歸裝無薏苡，烏聊高臥有菟裘。  
祇愁篋裏干將在，夜夜精光貫斗牛。

送董考功歸省

頻年天部仰光輝，一日思親向鯉闈。  
但使帝京歸水鏡，未妨子舍侍斑衣。  
日高江樹啼鶯滿，花盡山城見客稀。  
最是清朝需補袞，可容長臥白雲扉。

焦氏澹園續集卷之二十五目錄

五言絕句

毗山園雜詠二十首

六言絕句

親友人閔壽卿像思企不足以四詩爲頌

焦氏澹園續集卷之二十五

五言絕句

毗山園雜詠二十首爲潘朗叔賦

南陔堂

萊衣袖欲舉潘園輿且駐從知下菰中復覩南陔  
意

漪蘭館

秋蘭發華滋植根未當戶詎必賦反騷幽館香自  
度

石林

亂石疊爲山碧靄積深樹石髓知可求只在青山  
墅

清綺樓

樓栖上代物心同上代遊摩娑鍾鼎色髣髴見殷  
周

蕉芭

枝枝遶簷巾葉葉當窻淨時從葉上書醉墨森相  
映

竹林園

簣簴倚珠閣佛日應時長  
宴坐名言絕空庭聞妙香

雪苑

種梅層崖顛老幹半成鐵  
逢春都着花疑是中林雪

松寮

空寮茶事歇霏霏墜花雨  
亦欲學張譏松枝代談塵

明月渚

山空暑氣渺水闊月明多  
照影朱顏在無妨近逝  
波

茶嶼

靈草隱重巖飛鳥自來去  
茶烟一縷生幽人不知  
處

櫻桃塢

竹筍經時出含桃入眼新  
頻將櫻筍燕盡賞醉鄉  
春



瓢泉

綠淨天無風殘月照石壁爲攜試茶人一泓在空  
碧

小山

飛梁風日明陂陲魚鳥泳徘徊坐磐石愛此青桂  
影

蓮葉渡

泊舟近方橋月出谿水淥采蓮人未歸遙聞欸乃  
曲

菊柴

采采籬邊菊何如金滿籬便從千載後雙眼到淵明

鹿坪

山深松檜古石瘦薜蘿幽欲托鴻冥意閒將鹿女遊

飛雲隴

岡勢高復下湖靄散還有遊人自相問此是人間否

苑亭

平臺帶遠樹兩岸寒蘆發  
遂令庭戶間坐見滄洲  
色

荇湖

隴靄孤飛盡擊汰且盤桓  
中有魚龍語沈波鑒斗  
寒

榴墅

春盡花欲殘庭虛榴始發  
會使毗山園芳菲不暫  
歇

六言絕句

親友人閱壽卿像思企不足以四詩爲頌

勝遊騁目千里世事閑看一漚得意裴仙斗室放  
懷范蠡扁舟

壯年巨筆如椽東方有牘三千老至都無一物日  
高枕翹閒眠

金山曾伴驢年幔亭亦扳鶴駕我自非釋非玄任  
汝呼牛呼馬

落落風霜筋骨翩翩龍馬精神憑君少住千歲長

作華陽主人

焦氏澹園續集卷二十五

焦氏澹園續集卷之二十六目錄

七言絕句

寄潘朝言

宮詞

羅震谷七十二首

贈邢供奉二首

仙翁贈言兼索玄暢樓勝賦答二首

絕句

送祖心說經山陽二首

焦氏澹園續集卷二十六

七言絕句

寄潘朝言

慇懃不惜書千里潦倒那知臥一山久矣交情成  
市道爲君清淚落人間

宮詞

宛轉蛾眉只自憐長門一別動經年相如詞賦從  
來絕咫尺那能到御前

羅震谷七十贈二絕句

樓上傳經吾子行平生使氣傲公卿彩毫時散金  
床色片片飛花墮玉京  
半壺濁酒陶元亮萬卷殘書葛稚川小雨輕風香  
篆裊不妨長對菊花眠

邢供奉二首

內粧渾似董雙成十二能歌入破聲翻得新腔仍  
自惜流傳未滿建康成  
分付清歌與客心風情絆惹縷衣金昭陽不道雲  
霄隔猶帶霓裳法部音



仙翁贈言兼索玄暢樓勝賦答二首

學道曾窺混沌初，頻年身世墮空虛。  
白頭贏得希夷笑，猶有浮名費埽除。

玄暢樓成鶴馭賒，桂旂蘭幄鬪高華。  
玉人不乏三天字，却愛當年蔡少霞。

絕句

圯上一編真我師，山中七策久忘機。  
子房暫爲鴻飛出，范蠡今從蝦菜歸。

不知身自是仙才，夢裡朝元日幾回。  
指點蓬萊水

清淺醉乘鸞鶴又歸來

花明月淡海天秋三十六重烟雨樓數載欲歸歸  
未得看君先上木蘭舟

世事浮烟着猛回山中况有水雲師莫教老去方  
知悔空對西風賦病梨

送祖心說經山陽二首

苦海誰爲出世人又憑飛錫度淮雲漫持天竺無  
生法喚醒閻浮有漏身

軍持一發可能攀鹿女銜花去杳然石濩烟雲今

夕見秣陵風日幾時還

夏日

鶴韻荷香靜與羣墨花  
斐疊氣氤氲日長自愛塵  
囂遠閒傍松窻寫紫文

一道飛泉出石陰槐龍挾  
雨晝蕭森鼎中茶熟花  
生雪消盡人間熱惱心

焦氏澹園續集卷之二十七目錄

詩餘

九首

焦氏澹園續集卷之二十七

詩餘

滿江紅壽程孺人

七十華年問全福人誰得似還又見高堂設帨仲  
春天氣有子翩如森砌玉孫枝更得追風驥喜玳  
筵開處滿簪裾笙歌沸花繞步燈搖醉明月豔  
驚鴻態笑顙和扣石麻姑鞭背不必親扶靈壽杖  
時來將赴瑤池會看蟠桃結子又開花三千歲

雨中花慢

題三教會宗圖

名利交馳昏夜無休人間苦海茫茫問如何瞿塘  
撲馬歧路亡羊誰是長年三老一竿坐斷危灘有  
濠梁道士東魯逢衣天竺緇郎玄言如屑妙思  
翻空稀微烟渺雲翔更那知迷之霄壤悟只尋常  
金地不離方寸白雲何必仙鄉夢醒東家盡虛空  
界總是還冊

雨中花慢 題五嶽臥遊圖

馬上三年五嶽真形錦囊衣帶長留喜谿山浩渺  
風月夷猶一壑眼前自足千巖脚底冥搜笑向平

老子未了平生兒女閒愁 采真何處驂鸞駕鶴  
夢魂天際悠悠渾未解仙遊不遠聞早回頭欲令  
衆山皆響何妨臥對南樓好天良夜鼓琴動操勝  
槩都收

清平樂二首周封翁八十

烟融日膩正小春天氣况是鸞書雲外至滿勸仙  
翁一醉 壺中歲月方長江南草木吹香拚取此  
身強健功名飽看兒郎

斑斕彩袖笑捧金船酒綠橘黃橙娛白晝三祝千

清江集卷二十一  
齡長壽 閒來踏遍牛山浮屠絕處曾攀看取老  
來筋力神仙只在人間

虞美人顧宜人七十

小春壽燕年年早更覺今年好金昆玉友總時英  
看取相隨平步到蓬瀛 杯中滿汎秦淮綠豔舞  
夢如玉翩翩萱草可憐生長與北堂松桂共青青  
百字令楊孺人六十

長空如洗正昨宵纔過天中嘉節燕寢凝香珠履  
集此日蟾宮仙謫竹影篩金榴花噴火中有人華



髮慘慘素手悅與綵絲同設 最喜翠竿紅翻鱗  
鱗酒面又對如鉤月好喚玉娥來洛浦小按六么  
新拍綺席歡餘芸堂漏靜莫惜金樽側遙瞻天際  
婺光已動南極

慶長春壽江峰何封翁八十

赫赫絲綸曾兩從天墜衡門生色綵服烏紗相映  
處矯矯顏紅髮白蒲葉浮杯江魚入饌況遇生申  
節薰風滿座神仙環珮清切 多少桃獻瑤池鹿  
騎蓬島一笑乾坤窄未擬招邀遊汗漫先報長生

消息繡幕香圍歌聲舞影且醉三千客廣成同歲  
看翁千有二百

木蘭花慢詠坐隱圖

蘿山成小隱見烏兔自西東一徑白雲家僮未埽  
宛似崆峒只恐爛柯人到覺風光不與世塵通拈  
取奩中黑白縱觀枰上雌雄經綸事業笑談中  
局面幾番同任是解圍先着獨占機鋒間思殷周  
劉項算到頭蕉鹿總成空何必瀉山拍手醉眠明

月千松

卷二十七終